

Fundacion Balansa Nobo ta para su actividadnan

FUNDACION Balansa Nobo a keda funda na aña 2009 cu e meta di ofrece ayudo di debe na Aruba, esta, yuda hende cu tawata den problema cu debe y traha riba prevencion di e tipo di problemanan aki.

Ayudo di debe ta algo sumamente importante na Aruba. Un cantidad substancial di poblacion di e isla tin cu biba cu un peso di debe di tal indole cu nan gastonan mensual ta mas halto cu nan entrada. Esey por tin diferente causa: Tin hende cu no sa bon con pa maneha placa, tin cu ta fia mas cu loke nan por paga of ta haci compra riba credito, pero den algun caso e por ta debi tambe na un divorcio, enfermedad, of debi cu esun cu tawata mantene e famia a fayece of perde trabou. Cu tempo, esey ta hiba na un situacion cu e hendenan no ta den posicion mas di por paga nan debenan na tempo, loke na su turno por hiba na tur tipo di

problema: beslag riba salario, ausencia na trabou debi na enfermedad (AO), hende ta perde nan cas, cay den criminalidad, bira socialmente margina, incluso e yiunan di e famia—den poco palabra, pobreza.

Den e ultimo añanan, e fundacion a sa di traha areglo di pago pa decenas di hende cu e instancianan cu nan ta debe placa. Di e manera ey, nan a haya e perspectiva di un dia por bolbe na un situacion financiero sano. Tambe e fundacion a sifia nan con nan mester maneha nan presupuesto. Ademas di esaki, el a duna informacion na empresanan, studiantenan y otronan, tocante maneho di presupuesto y tocante con nan por evita di haya nan mes den un situacion di debe problematico. Den poco tempo e fundacion a gana e confiansa di su clientenan, e instancianan cu e clientenan nan tawata debe y instancianan di gobierno, y

el a sa di acumula experticio sumamente valioso.

Un par di cifra actual;

- Fundacion Balansa Nobo na momento di cera tin 42 clientenan (famianan) den e programa Areglo di Debe. Esey kiermen pa e 42 clientenan nos a regla acuerdonan hunto cu e creditornan di paga debe bek y nos lo haci sigur cu tur pagonan lo wordo ehecuta fin di luna.

- Un total di 4 clientenan a cumpli cu e programa y awor no tin debenan mas.

- Na e momentonan aki nos tin un wachtlíjst di 30 personanan (famianan) cu ta warda pa drenta e programa Areglo di Debe. Famianan cu tin situacion di debenan problematico.

- Fundacion Balansa Nobo a ofrece e servicionan di Budget Coaching. Esey kiermen asisti clientenan con pa maneha nan presupuesto di cas. Nos a yuda 20 clientenan pa organiza y

maneha nan administrativo y presupuesto y asina no yega den situacion di debe.

- Fundacion Balansa Nobo a ofrece e servicio di conseho financiero. Nos a yuda mas cu 360 ciudadanonan cu conseho financiero.

- Den e parti di prevencion nos a duna mas cu 85 charlanan "Debe y Economisa" pa diferente companianan, scol y otro fundacionnan. Den mesun momento nos a duna nan mas cu 13 workshops "Mi presupuesto" na diferente instancianan y companianan.

- For di e dia cu nos a habri nos Fundacion pa publico na 2010 nos a yuda in total 456 famianan; via e programa Areglo di Debe nos a yega un areglo di paga debe cu credito nan na un total di Awg. 2,845,246.52. Esey ta significa cu nos ta bezig ta pagando mas cu 2 miyon Florin bek na debenan atrasa di nos clientenan.

Te 2014, Fundacion Balansa Nobo a ricibi subsidio di Pais Aruba pa cumpli cu su trabou. Sin embargo, e fundacion no ta inclui den presupuesto di 2014 y actualmente no tin claridad si e lo ta inclui den presupuesto di 2015. Awor cu su reservanan financiero a agota, e fundacion ta obliga di para su servicionan. E fundacion ta mira esaki como algo sumamente lamentabel, particularmente en bista di e echo cu awor cu situacion economico na Aruba ta bayendo atras, e chens ta grandi cu mas hende lo cay den problema financiero.

Apesar cu ta hopi placa, incluso di gobierno, tin inverti den e fundacion, awor cu e mester para su actividadnan, e experticio acumula cu tanto esfuerzo lo bay perdi. Ta sumamente lamentabel tambe cu no por sigui cu e bon trabou y esfuersonan grandi di parti di e empleadonan.